

INDICTIO

PRIMÆ MARIANOPOLITANÆ SYNODI.

IGNATIUS BOURGET,

Dei et Apostolicæ Sedis gratia Episcopus Marianopolitanus, Pontificali Solio Assistens, etc., etc.

Universis Præsentes Litteras inspecturis, Salutem in Domino.

Inter pleraque alia Episcopalis sollicitudinis officia, præcipuum sibi locum vindicat hæc olim annua veterum canonum jure, ac nuper Tridentini Concilii Decreto constituta Diœcesanæ Synodi convocatio atque actio utpote quæ ad disciplinæ ecclesiasticæ, si collapsa sit, instaurationem, si adhuc vigeat, conservationem et perfectionem, maxime conferre potest. Quocirca Nos, Sanctorum Antistitum vestigiis inhærere cupientes, variisque tanti momenti executionem officii usque adhuc prohibentibus hodie difficultatibus feliciter remotis, his Nostris Litteris, Nostræ Cathedralis Ecclesiæ Capitulum, omnes et singulos qui in hac Diœcesi nostra beneficia seu officia ecclesiastica obtinent quibus animarum cura annexa sit, Superiores et Rectores Seminariorum, Religiosorum Ordinum, collegiorum, nec non Superiores Ecclesiasticos ac Capellanos Monialium seu Virginum Deo dicatarum monemus in Domino, iisdemque omnibus et singulis, in virtute sanctæ obedientiæ, ac sub pœnis canonum Sacrorum jure sanctitis, jubemus atque edicimus, ut ipsi clericali habitu decenti ac superpelliceis mundis induti, die vigesima tertia Mensis